



სახელმწიფო შესყიდვების
სააგენტოს თავმჯდომარის
გ ა ნ კ ა რ გ უ ლ ე ბ ა



KA080140911167923

№ 2073

19 / ივლისი / 2023 წ.

შპს „პლაზმა ჯის“ შავ სიაში დარეგისტრირების შესახებ

შემსყიდველი ორგანიზაცია: შპს „საქართველოს გაერთიანებული წყალმომარაგების კომპანია“;

ტენდერის ნომერი: NAT230008724;

შესყიდვის ობიექტი: 42100000 – დანადგარები მექანიკური ენერგიის წარმოებისა და გამოყენებისთვის;

პრეტენდენტი: შპს „პლაზმა ჯი“ (ს/ნ: 406249590);

წერილობითი შეტყობინების საფუძველი: ხელშეკრულების დადების უფლების მოპოვების მიზნით არაკეთილსინდისიერი ქმედების ჩადენა.

აღწერილობითი ნაწილი

1. ადმინისტრაციული წარმოების დაწყება

1.1. სახელმწიფო შესყიდვების სააგენტოში 2023 წლის 13 ივნისს წარმოდგენილ იქნა შპს „საქართველოს გაერთიანებული წყალმომარაგების კომპანიის“ 2023 წლის 12 ივნისის №10351/1 წერილობითი შეტყობინება (რეგისტრაციის № 4949), რომლითაც სააგენტოს ეცნობა NAT230008724 ელექტრონული ტენდერიდან პრეტენდენტის – შპს „პლაზმა ჯის“ (ს/ნ: 406249590) დისკვალიფიკაციის შესახებ ხელშეკრულების დადების უფლების მოპოვების მიზნით არაკეთილსინდისიერი ქმედების ჩადენის გამო.

1.2. სააგენტომ პრეტენდენტს, სახელმწიფო შესყიდვების ერთიან ელექტრონულ სისტემაში მის პროფილში მითითებული ელექტრონული ფოსტის მისამართის plasmage2022@gmail.com მეშვეობით, 2023 წლის 15 ივნისს № 2091 წერილით აცნობა სააგენტოში შემსყიდველი ორგანიზაციის წერილობითი შეტყობინების წარმოდგენის თაობაზე და, სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-5 მუხლის მე-5 პუნქტის შესაბამისად, სთხოვა ხსენებულ საქმეზე წერილობითი განმარტების წარმოდგენა. პრეტენდენტს განმარტება არ წარმოუდგენია.

2. შემსყიდველი ორგანიზაციის პოზიცია

2.1. შემსყიდველი ორგანიზაციის წერილობითი შეტყობინების თანახმად, პრეტენდენტმა NAT230008724 ელექტრონულ ტენდერში დაზუსტებული ტექნიკური დოკუმენტაციის სახით სხვა დოკუმენტებთან ერთად, შეთავაზებული საქონლის ტექნიკური მახასიათებლების სატენდერო დოკუმენტაციით დადგენილ ტექნიკურ დავალებასთან შესაბამისობის დასადასტურებლად, წარადგინა შესყიდვის ობიექტების მწარმოებელი კომპანიების, მათ შორის „Franklin Electric S.r.l“-ის, მიერ გაცემული დადასტურების წერილები.

2.2. შემსყიდველ ორგანიზაციასა და კომპანია „Franklin Electric S.r.l“-ის გაყიდვების მენეჯერს შორის ელექტრონული ფოსტის მეშვეობით განხორციელებული მიმოწერის შედეგად, 2023 წლის 8 ივნისს შემსყიდველ ორგანიზაციას ეცნობა, რომ პრეტენდენტის მიერ წარდგენილი დოკუმენტი არ იყო გაცემული მწარმოებელი კომპანიის, „Franklin Electric S.r.l“-ის მიერ და იყო ყალბი.

2.3. ზემოაღნიშნული გარემოებების გათვალისწინებით, შემსყიდველი ორგანიზაციის სატენდერო კომისიამ 2023 წლის 8 ივნისს №4 სხდომის ოქმით, სახელმწიფო შესყიდვების სააგენტოს თავმჯდომარის 2017 წლის 14

ივნისის № 12 ბრძანებით დამტკიცებული „ელექტრონული ტენდერის ჩატარების წესის“ 32-ე მუხლის პირველი პუნქტის „გ“ ქვეპუნქტის საფუძველზე, შპს „პლაზმა ჯის“ (ს/ნ: 406249590) მისცა დისკვალიფიკაცია ხელშეკრულების დადების უფლების მოპოვების მიზნით არაკეთილსინდისიერი ქმედების ჩადენის გამო.

3. პრეტენდენტის პოზიცია

ადმინისტრაციული წარმოების ფარგლებში პრეტენდენტს განმარტება არ წარმოუდგენია.

4. სააგენტოს მიერ დადგენილი გარემოებები

4.1. 2023 წლის 19 აპრილს შპს „საქართველოს გაერთიანებულმა წყალმომარაგების კომპანიამ“ გამოაცხადა NAT230008724 ელექტრონული ტენდერი მექანიკური ენერგიის წარმოებისა და გამოყენებისთვის საჭირო დანადგარების (CPV42100000) შესყიდვის მიზნით.

4.2. NAT230008724 ელექტრონულ ტენდერში მონაწილეობა მიიღო შპს „პლაზმა ჯიმ“ (ს/ნ: 406249590).

4.3. სატენდერო დოკუმენტაციის 2.7.1.1. პუნქტის თანახმად, პრეტენდენტს უნდა წარედგინა შესყიდვის ობიექტის მწარმოებელი კომპანიის მიერ გაცემული დოკუმენტი/წერილი, რომელიც დაადასტურებდა პრეტენდენტის მიერ შეთავაზებული საქონლის ტექნიკური მახასიათებლების შესაბამისობას სატენდერო დოკუმენტაციით დადგენილ ტექნიკურ დავალებასთან.

4.4. პრეტენდენტმა NAT230008724 ელექტრონულ ტენდერში როგორც ტექნიკური, ასევე დაზუსტებული ტექნიკური დოკუმენტაციის სახით წარადგინა ფასების ცხრილი, სადაც შესყიდვის ობიექტის 24-ე პოზიციად მითითებული იყო მწარმოებელი კომპანია „Franklin Electric S.r.l“-ის, EV6/30 მოდელის ტუმბო-აგრეგატი.

4.5. პრეტენდენტმა NAT230008724 ელექტრონულ ტენდერში 2023 წლის 2 ივნისს დაზუსტებული ტექნიკური დოკუმენტაციის სახით სხვა დოკუმენტებთან ერთად, შეთავაზებული საქონლის ტექნიკური მახასიათებლების სატენდერო დოკუმენტაციით დადგენილ ტექნიკურ დავალებასთან შესაბამისობის დასადასტურებლად, წარადგინა შესყიდვის ობიექტების მწარმოებელი კომპანიების, მათ შორის „Franklin Electric S.r.l“-ის, მიერ გაცემული დადასტურების წერილები.

4.6. შემსყიდველ ორგანიზაციასა და კომპანია „Franklin Electric S.r.l“-ის გაყიდვების მენეჯერს შორის ელექტრონული ფოსტის მეშვეობით განხორციელებული მიმოწერის შედეგად, 2023 წლის 8 ივნისს შემსყიდველ ორგანიზაციას ეცნობა, რომ პრეტენდენტის მიერ წარდგენილი დოკუმენტი არ იყო გაცემული მწარმოებელი კომპანიის, „Franklin Electric S.r.l“-ის, მიერ და იყო ყალბი.

4.7. ზემოაღნიშნული გარემოებების გათვალისწინებით, შემსყიდველი ორგანიზაციის სატენდერო კომისიამ 2023 წლის 8 ივნისს №4 სხდომის ოქმით, სახელმწიფო შესყიდვების სააგენტოს თავმჯდომარის 2017 წლის 14 ივნისის № 12 ბრძანებით დამტკიცებული „ელექტრონული ტენდერის ჩატარების წესის“ 32-ე მუხლის პირველი პუნქტის „გ“ ქვეპუნქტის საფუძველზე, შპს „პლაზმა ჯის“ (ს/ნ: 406249590) მისცა დისკვალიფიკაცია ხელშეკრულების დადების უფლების მოპოვების მიზნით არაკეთილსინდისიერი ქმედების ჩადენის გამო.

სამოტივაციო ნაწილი

5. შემაჯამებელი დასკვნა

საქმეში არსებული მტკიცებულებებისა და გარემოებების შეფასებისა და ურთიერთშეჯერების საფუძველზე, სააგენტო მიიჩნევს, რომ შპს „პლაზმა ჯი“ უნდა დარეგისტრირდეს შავ სიაში.

6. გამოყენებული სამართლებრივი აქტები

„სახელმწიფო შესყიდვების შესახებ“ საქართველოს კანონი, „ელექტრონული ტენდერის ჩატარების წესის“ დამტკიცების შესახებ“ სახელმწიფო შესყიდვების სააგენტოს თავმჯდომარის 2017 წლის 14 ივნისის № 12 ბრძანება, სახელმწიფო შესყიდვების სააგენტოს თავმჯდომარის 2015 წლის 29 ოქტომბრის №19 ბრძანებით დამტკიცებული „შავი სიის წარმოების წესი და პირობები“.

7. სამართლებრივი შეფასება

7.1. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-3 მუხლის პირველი პუნქტის თანახმად, ელექტრონული ტენდერის შემთხვევაში, პრეტენდენტის შავ სიაში დარეგისტრირების საფუძველია, თუ იგი დისკვალიფიცირებულია ტენდერიდან ხელშეკრულების დადების უფლების მოპოვების მიზნით არაკეთილსინდისიერი ქმედების ჩადენის გამო.

7.2. იმავე წესის მე-7 მუხლის მე-2 პუნქტის შესაბამისად, საქმეში არსებული გარემოების გამოკვლევის, შეფასებისა და ურთიერთშეჯერების შედეგად, სააგენტო ადგენს, არსებობს თუ არა პრეტენდენტის/ მიმწოდებლის შავ სიაში დარეგისტრირების საფუძველი. იმ შემთხვევაში, თუ არსებობს ამ მუხლის მე-4 პუნქტით გათვალისწინებული გარემოებები, სააგენტო იღებს გადაწყვეტილებას პრეტენდენტის/ მიმწოდებლის შავ სიაში დარეგისტრირებაზე უარის თქმის შესახებ, ხოლო იმ შემთხვევაში, თუ არსებობს პრეტენდენტის/ მიმწოდებლის შავ სიაში დარეგისტრირების საფუძველი, სააგენტო, ამ მუხლის

შესაბამისად, იღებს გადაწყვეტილებას პრეტენდენტის/მიმწოდებლის გაფრთხილების ან შავ სიაში დარეგისტრირების შესახებ.

7.3. სახელმწიფო შესყიდვების სააგენტოს თავმჯდომარის 2017 წლის 14 ივნისის № 12 ბრძანებით დამტკიცებული „ელექტრონული ტენდერის ჩატარების წესის“ 32-ე მუხლის პირველი პუნქტის „გ“ ქვეპუნქტის თანახმად, პრეტენდენტი ექვემდებარება დისკვალიფიკაციას, თუ იგი ხელშეკრულების დადების უფლების მოპოვების მიზნით ჩაიდენს არაკეთილსინდისიერი ქმედებას.

7.4. „სახელმწიფო შესყიდვების შესახებ“ საქართველოს კანონის მე-3 მუხლის პირველი პუნქტის „შ“ ქვეპუნქტის თანახმად, აფიდავიტი წარმოადგენს წერილობით დოკუმენტს, რომლის ხელმოწერი ადასტურებს დოკუმენტში მითითებული ინფორმაციისა და გარემოებების უტყუარობას და საქართველოს კანონმდებლობით დადგენილი წესით პასუხს აგებს აღნიშნული ინფორმაციისა და გარემოებების უტყუარობისთვის. ამასთან, „ელექტრონული ტენდერის ჩატარების წესის“ დამტკიცების შესახებ სახელმწიფო შესყიდვების სააგენტოს თავმჯდომარის 2017 წლის 14 ივნისის № 12 ბრძანების დანართის № 1-ით დამტკიცებული აფიდავიტის ფორმისა და პირობების მიხედვით, გამოცხადებულ ტენდერში/კონკურსში მონაწილეობის მიღების მიზნით პრეტენდენტი ადასტურებს, რომ მას არ წარუდგენია მცდარი ინფორმაცია, რაც იყოფა ან უნდა სცოდნოდა პრეტენდენტს, ხოლო აფიდავიტის პირობების დარღვევის შემთხვევაში, იგი მიიღებს დისკვალიფიკაციას ხელშეკრულების დადების უფლების მოპოვების მიზნით არაკეთილსინდისიერი ქმედების ჩადენის გამო.

7.5. განსახილველ შემთხვევაში დგინდება, რომ მიმწოდებელმა NAT230008724 ელექტრონულ ტენდერში ხელშეკრულების დადების მიზნით წარადგინა მცდარი ინფორმაცია. პრეტენდენტმა NAT230008724 ელექტრონულ ტენდერში დაზუსტებული ტექნიკური დოკუმენტაციის სახით სხვა დოკუმენტებთან ერთად, შეთავაზებული საქონლის ტექნიკური მახასიათებლების სატენდერო დოკუმენტაციით დადგენილ ტექნიკურ დავალებასთან შესაბამისობის დასადასტურებლად წარადგინა შესყიდვის ობიექტების მწარმოებელი კომპანიების, მათ შორის კომპანია „Franklin Electric S.r.l“-ის, მიერ გაცემული დადასტურების წერილები. სააგენტო ყურადღებას ამახვილებს შემსყიდველ ორგანიზაციისა და კომპანია „Franklin Electric S.r.l“-ის გაყიდვების მენეჯერს შორის ელექტრონული ფოსტის მეშვეობით განხორციელებულ მიმოწერაზე, რომლითაც ირკვევა, რომ პრეტენდენტის მიერ წარდგენილი დოკუმენტი არ იყო გაცემული მწარმოებელი კომპანიის, „Franklin Electric S.r.l“-ის, მიერ და არ იყო ავთენტური. ყოველივე ზემოაღნიშნულიდან გამომდინარე, სააგენტო მიიჩნევს, რომ სახეზეა აფიდავიტის პირობების დარღვევა და NAT230008724 ელექტრონულ ტენდერში პრეტენდენტის მიერ ხელშეკრულების დადების უფლების მოპოვების მიზნით ჩადენილ იქნა არაკეთილსინდისიერი ქმედება, რის გამოც არსებობს შპს „პლაზმა ჯი“ შავ სიაში დარეგისტრირების საფუძველი.

7.6. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-6 პუნქტის თანახმად, შავ სიაში დარეგისტრირების შესახებ გადაწყვეტილება მიიღება იმ შემთხვევაში, თუ შემსყიდველი ორგანიზაციის მიერ წარდგენილი ინფორმაცია სრულად აკმაყოფილებს ამ წესის მე-3 და მე-4 მუხლებით განსაზღვრულ მოთხოვნებს და არ არის სახეზე შავ სიაში დარეგისტრირებაზე უარის თქმის ან გაფრთხილების საფუძველი. ამავე მუხლის მე-7 პუნქტის თანახმად, თუ დადგინდა, რომ პრეტენდენტმა/მიმწოდებელმა ხელშეკრულების დადების უფლების მოპოვების მიზნით ჩაიდინა არაკეთილსინდისიერი ქმედება, იგი ექვემდებარება შავ სიაში რეგისტრაციას და მის მიმართ გაფრთხილება არ გამოიყენება.

7.7. სააგენტო მიიჩნევს, რომ შემსყიდველი ორგანიზაციის წერილობითი შეტყობინება აკმაყოფილებს ზემოხსენებული წესის მე-3 და მე-4 მუხლებით განსაზღვრულ მოთხოვნებს. ამასთან, სახეზეა პრეტენდენტის შავ სიაში დარეგისტრირების წინაპირობა და არ არსებობს მისი შავ სიაში დარეგისტრირებაზე უარის თქმის ან გაფრთხილების საფუძველები, რადგან დგინდება, რომ შპს „პლაზმა ჯი“ (ს/ნ: 406249590) NAT230008724 ელექტრონულ ტენდერში ხელშეკრულების დადების უფლების მოპოვების მიზნით ჩაიდინა არაკეთილსინდისიერი ქმედება. შესაბამისად, შპს „პლაზმა ჯი“ უნდა დარეგისტრირდეს შავ სიაში.

სარეზოლუციო ნაწილი

სააგენტომ იხელმძღვანელა სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-6 და მე-7 პუნქტებით და დაადგინა:

1. შპს „პლაზმა ჯი“ (ს/ნ: 406249590) 2023 წლის 20 ივლისს დარეგისტრირდეს შავ სიაში.
2. ამ განკარგულების აღსრულება დაევალოს სახელმწიფო შესყიდვების სააგენტოს ინფორმაციული ტექნოლოგიების დეპარტამენტს.
3. ეს განკარგულება შეიძლება გასაჩივრდეს მისი ოფიციალური გაცნობის დღიდან ერთი თვის ვადაში, თბილისის საქალაქო სასამართლოს ადმინისტრაციულ საქმეთა კოლეგიაში (ქ. თბილისი, დავით აღმაშენებლის ხეივანი № 64), კანონმდებლობით დადგენილი წესით.

